

Interes di Mucha y Carnaval

PA hopi hende Carnaval ta un temporada di alegria, gozo, cu hopi fiesta, baile y canto. Pero den e temporada aki tambe nos ta mira situacionnan unda e interes di mucha no ta na prome lugar, unda no ta tene cuenta cu mucha y cu loke ta apropia pa mucha.

Tin Carnaval di adulto y tin Carnaval pa mucha caminda e mucha mester ta poni central. Nos tur mester corda cu durante Carnaval tambe mester cumpli cu e Derechonan di Mucha. Especialmente derecho riba diberticion sano, derecho riba amor, comprension, cariño y sociego, derecho riba enseñansa, y derecho riba proteccion contra maltrato, descuido y negligencia.

Muchanan no mag di bira victima di falta di responsabilidad di adulto !!

Aki ta sigui algun punto cu por yuda mayor y otro adulto haci e temporada di Carnaval uno agradabel y safe pa mucha:

- Pone bo yiu na prome lugar.

Mester respeta e mucha y no fors'e haci cosnan cu abo y otro hende ta haya leuk, manera siñ'e y encurash'e balia na manera no apropia pa mucha. Of bisti e na manera no apropia pa mucha.

- Combersa cu bo yiu. Tuma tempo pa combersa cu bo yiu tocante cosnan (cu por ta straño y diferente) cu e ta mira den e dianan aki. Reacciona riba su pregunta y su preocupacionnan.

- No laga baby y mucha bao di 4 aña participa den parada.

- No forsa mucha pa participa den parada of otro

actividad carnavalesco.

- No hiba mucha actividad carnavalesco cu ta pa adulto.

- Cuida y guia pa bo yiu. Busca alternativa si bo tin yiu chikito of yiu cu no ta gusta carnaval y abo si kier bai. Esaki por ta un babysitter of un centro di mucha. Check cu famia, cono-cirnan, den corant of informa na Fundacion Pa Nos Muchanan pa centronan di mucha cu ta habri. Importante ta pa bo sa cu e persona cu lo bai wak pa bo yiu ta un adulto responsabel y amabel.

- No sali tur dia pa algo di Carnaval.

Bo yiu tin necesidad di bo compania y atencion.

- E rutina diario ta importante p'e mucha crece sano.

No laga bo yiu perde soño pa actividadnan pa mucha cu ta

tuma luga den siman anochi.

Corda cu scol ta sigui su mañan! No laga bo yiu presencia programa di television y radio cu ta tuma luga den ora cu e tin cu drumi.

- Evita perde di mucha durante paradanan.

Tira bon bista riba muchanan. No bai gosa y lubida riba nan. Depende di su edad, siña bo yiu loke e mester bisa y haci si acaso e perde bo. Mustr'e persona uniforme manera polis cu e por pidi pa yud'e. Percura tambe pa e mucha sa su nomber completo, adres y un number di telefon of tin un carchi cu e informacion aki pega na su paña.

- Responsabilidad pa mucha y uso di droga y alcohol.

Ta conoci cu alcohol y otro droga tin efecto riba e capacidad di hende pa reacciona na manera adecua y rasonabel.

Den e temporada di Carnaval tin hopi hende, mayor tambe, cu ta bebe alcohol y ta usa droga. Mester evita cu ora bo tin mucha cu bo y pa kende ta bo responsabel, pa perde control riba bo sano huicio.

Evita perde control riba bo mes y hinca mucha, tambe otronan den bo becindario, den situacion peligroso y dañino manera causa accidente cu auto, maltrata mucha cu palabra y dor di dal e. E consecuencianan di bo comportacion despues por duel bo. Mester tene na cuenta cu bo comportacion ta ehempel pa bo yiunan.

Carnaval mester keda algo agradabel, tambe pa muchanan, unda nan por pasa ratonan alegre y contento. Coopera pa nan por gosa di Carnaval. Guia nan, duna un bon ehempel y proteha nan.